

**U 6 d'ottobre, avete da presentà i scontri di A Fior di carta à l'Alb'Oru cù nove autori di a vostra casa d'edizione. Chi serà u scopu di st'eventimentu ? Si pò di chì hè di più impurtante oghje di tessu una leia trà i scrittori è i lettori ?**

L'incontru trà autori è lettori si prateca à spesso, ma per « A Fior di carta », chì ùn pussede nisun arnese di sparghjera, hè impurtante di fà cunnosce i nostri autori è e so opere direttamente à u cuntattu di u publicu. Hè per quessa chì organizemu cinque o sei incontri à l'annu, primurendu ci di una presenza cullettiva.

**Dapoi a so creazione in u 2006, A Fior di carta hà publicatu più di 150 libri, cù una pruduzione chì vò sempre per cresce. In corte parolle, chì bilanci fate di a casa d'edizione dapoi sti dodeci anni ?**

« A Fior di carta » ùn hè micca una casa d'edizione professionale. Tutte e nostre realizzazioni sò u fattu di a benevolenza. Ciò chì, per contu meiu, nicessiteghja un attu militante chì ùn si pò spicà d'un ingaggiamentu vechju d'un mezu seculu à prò di a causa di u populu corsu, a letteratura essendu custitutiva di l'imaginariu naziunale. Hè cusì chì sò editore militante è à l'occasione autore.

**À spesso si parla di l'interessu per a literatura chì hè sempre à calà. Ma quist'annu, avete publicatu 22 libri è ne avete cacciatu 24 l'annu scorsu. Vale à di chì ci hè un'attesa quantunque ? Omancu a pruduzione ci hè...**

Ùn sò micca sicuru ch'ellu ci sia una dumanda particolare, ma cum'è voi a sapete, quelli chì s'alzanu nanz'à u ghjornu ùn aspettanu micca ch'ellu si pesi u sole per entre in azione. Aghju cunnisciutu quessa, tempi fà, in l'ingaggiamenti assai menu cunfurtevoli chè quelli di a scrittura literaria. Tutti quelli chì s'ingagianu per qualchì causa sia pruponenu u pocu di e so brame è sacrificheghjanu assai di u so tempu. L'offerta ci hè sempre, ancu s'ella hè scarsa a dumanda.

**« A perfusione vene nanzu à l'agunia »**

**À maiò parte di e vostre pubblicazione sò bislingue è parehji libri sò solu in lingua corsa. Chi sguardu purtate nant'à l'edi-**



Photo CM

**zione in lingua corsa ? Si pò di ch'ella risponde à una dumanda ?**

A dumanda hè debbule s'omu ne stima di pettu à i risultati di u mercatu. A lingua corsa parlata o scritta vò per spenghje si per via chì u populu corsu stessu hè diventatu più chè minuritariu nant'à a so terra. Ùn si ne pò più « fabricà » Corsi in una tale situazione chì scappa à l'edile d'ogni tendenza. Ma fintantu ch'elli firmeranu Corsi, li steremu à fiancu per purtà cun elli issa cumunità di speranza detta « nazione ».

**À spesso, si sà chì e pubblicazione in lin-**

**gua corsa sò sustenute da e cullettività pubbliche, à tale puntu chì parlanu unepochi di « perfusione » di a pruduzione in corsu. Serà dinù u vostru parè ?**

Hè certa. È a perfusione vene innanzu à l'agunia. Si pò rigrettà chì i « perfusori » ùn ne sianu micca veramente cuscenti. Aghjusteraghju chì « A Fior di carta » hà sempre ricusatu un qualunque ricorsu à e suvvenzioni pubbliche. S'ellu ci vole à spariscè ormenu ch'ella si fia in la degnità. S'hè intesu di chì a literatura hè cum'è a marina, una hè mercante, l'altra hè di guerra. A nostra a literatura hè di lotta à u serviziu di u populu corsu.